

NACRT

Na osnovu odredbi člana 34. Zakona o radu Federacije Bosne i Hercegovine („Službene novine Federacije Bosne i Hercegovine“, broj: 26/16, 89/18 i 23/20), člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“ broj: 49/06 i 51/09), članova 23. i 25. Statuta Općine Stari Grad Sarajevo - Prečišćeni tekst („Službene novine Kantona Sarajevo“, broj: 20/13), Općinsko vijeće Općine Stari Grad Sarajevo, donosi:

PRAVILNIK O USLOVIMA I POSTUPKU IZBORA I PRIJEMA LICA NA STRUČNO OSPOSOBLJAVANJE BEZ ZASNIVANJA RADNOG ODNOSA U JEDINSTVENI OPĆINSKI ORGAN UPRAVE OPĆINE STARI GRAD SARAJEVO

I - OSNOVNE ODREDBE

Član 1. (Predmet Pravilnika)

Ovim Pravilnikom utvrđuju se uslovi, postupak izbora i prijema lica na stručnom osposobljavanju bez zasnivanja radnog odnosa, i to lica sa visokom stručnom spremom – VII stepen, odnosno lica sa završenim prvim, drugim ili trećim ciklusom bolonjskog studija, kao i lica sa stečenom srednjom stručnom spremom, za zanimanja za koja je kao uvjet za obavljanje istih predviđen, zakonom ili internim aktima, stručni ispit ili radno iskustvo.

Član 2. (Lice na stručnom osposobljavanju)

Pod licem na stručnom osposobljavanju u smislu odredbi ovog Pravilnika smatra se osoba sa visokom stručnom spremom – VII stepen, odnosno lica sa završenim prvim, drugim ili trećim ciklusom bolonjskog studija, kao i lica sa završenom srednjom stručnom spremom, za zanimanja za koja je kao uvjet za obavljanje istih predviđen, zakonom ili internim aktima, stručni ispit ili radno iskustvo.

Član 3. (Ugovor o stručnom osposobljavanju)

- (1) Stručno osposobljavanje lica iz člana 2. ovog Pravilnika zasniva se na osnovu Ugovora o stručnom osposobljavanju, koji se zaključuje u pismenoj formi i to za lica sa visokom

stručnom spremom – VII stepen, odnosno lica sa završenim prvim, drugim ili trećim ciklusom bolonjskog studija na period do 12 (dvanaest) mjeseci, odnosno za lica sa završenom srednjom stručnom spremom na period do 6 (šest) mjeseci, po osnovu raspisanog Javnog poziva.

- (2) Sa licem koje nakon sticanja visoke stručne spreme - VII stepen, odnosno nakon završetka prvog, drugog ili trećeg ciklusa bolonjskog studija ima 12 (dvanaest) mjeseci radnog iskustva, ne može se zaključiti ugovor iz stava (1) ovog člana.
- (3) Sa licem koje nakon sticanja srednje stručne spreme ima 6 (šest) mjeseci radnog iskustva, ne može se zaključiti ugovor iz stava (1) ovog člana.

Član 4.

(Prava lica na stručnom osposobljavanju)

Licima za vrijeme stručnog osposobljavanja osigurava se odmor u toku rada, dnevni odmor, između dva uzastopna radna dana i sedmični odmor, pod istim uslovima kao i za uposlenike u radnom odnosu, kao i prava po osnovu osiguranja za slučaj povrede na radu ili profesionalne bolesti u skladu sa propisima iz PIO/MIO.

Član 5.

(Plan stručnog osposobljavanja lica bez zasnivanja radnog odnosa)

Općinski načelnik, shodno prijedlogu službi za upravu Općine Stari Grad Sarajevo, donosi Plan stručnog osposobljavanja lica bez zasnivanja radnog odnosa za tekuću godinu, u kojem se obavezno navodi broj lica na stručnom osposobljavanju bez zasnivanja radnog odnosa po službama, kao i zanimanja, odnosno struke istih, shodno raspoloživim sredstvima u Budžetu Općine Stari Grad Sarajevo za tekuću godinu.

II - JAVNI POZIV ZA PRIJEM LICA NA STRUČNO OSPOBLJAVANJE BEZ ZASNIVANJA RADNOG ODNOSA

Član 6.

(Javni poziv)

- (1) Shodno Planu stručnog osposobljavanja lica bez zasnivanja radnog odnosa, iz člana 5. ovog Pravilnika, za tekuću godinu, Općinski načelnik raspisuje Javni poziv za prijem lica na stručnom osposobljavanju bez zasnivanja radnog odnosa.
- (2) Javni poziv iz stava (1) ovog člana se objavljuje u jednom dnevnom listi i na WEB stranici Općine Stari Grad Sarajevo i otvoren je tokom čitave kalendarske godine za koju je isti objavljen.

Član 7.
(Sadržaj javnog poziva)

(1) Javni poziv iz člana 6. ovog Pravilnika obavezno sadrži:

- a) naznaku da se radi o prijemu lica na stručno osposobljavanje bez zasnivanja radnog odnosa;
 - b) naznaku da se izbor i prijem lica na stručno osposobljavanje vrši u skladu sa uslovima iz ovog Pravilnika i Planom stručnog osposobljavanja lica bez zasnivanja radnog odnosa;
 - c) naznaku da stručno osposobljavanje traje 12 (dvanaest) mjeseci bez zasnivanja radnog odnosa za lica sa visokom stručnom spremom – VII stepen, odnosno završenim prvim, drugim ili trećim ciklusom bolonjskog studija, a za lica sa srednjom stručnom spremom 6 (šest) mjeseci;
 - d) naznaku ukupnog broja lica koja se primaju na stručno osposobljavanje i to ukupan broj za lica koja su stekla visoku stručnu spremu – VII stepen, odnosno koja su završila prvi, drugi ili treći ciklus Bolonjskog studija i ukupan broj za lica koja su stekla srednju stručnu spremu;
 - e) spisak potrebnih dokumenata kojima se dokazuje ispunjenost uslova iz Javnog poziva;
- (2) Javni poziv iz stava (1) ovog člana se sačinjava u skladu sa Planom stručnog osposobljavanja lica bez zasnivanja radnog odnosa iz člana 5. ovog Pravilnika.

III – USLOVI ZA PRIJAVU NA JAVNI POZIV

Član 8.
(Uslovi za prijavu na Javni poziv)

Uslovi koje lice mora ispunjavati za prijavu na Javni poziv za stručno osposobljavanje bez zasnivanja radnog odnosa:

- da je državljanin Bosne i Hercegovine;
- da je starije od 18 godina;
- visoka stručna sprema - VII stepen, odnosno završen prvi, drugi ili treći ciklus bolonjskog studija, odnosno srednja stručna sprema (ukoliko se prijavljuje za stručno osposobljavanje bez zasnivanja radnog odnosa za zanimanje za koje ima srednju stručnu spremu);
- da nakon sticanja visoke stručne spreme VII stepen, odnosno završenog prvog, drugog ili trećeg ciklusa bolonjskog studija nema 12 (dvanaest) mjeseci radnog iskustva, odnosno 6 (šest) mjeseci nakon sticanja srednje stručne spreme;

Član 9. **(Dokumentacija)**

(1) Kandidati koji se prijave na Javni poziv, prilažu dokaze o ispunjenosti uslova iz člana 8. ovog Pravilnika, original ili ovjerene fotokopije, i to:

- Prijavu sa kraćom biografijom (Obrazac u prilogu Javnog poziva)
- Uvjerenje o državljanstvu (ne starije od 6 mjeseci),
- CIPS- prijava mjesta prebivališta (ne starija od 6 mjeseci),
- Fakultetska diploma (nostrificirana diploma, ukoliko fakultet nije završen u BiH), za lica koja se prijavljuju za stručno osposobljavanje nakon sticanja visoke stručne spreme i to na period od 12 (dvanaest) mjeseci;
- Svjedočanstvo o završenoj srednjoj školi, za lica koja se prijavljuju za stručno osposobljavanje nakon sticanja srednje stručne spreme i to na period od 6 (šest) mjeseci;
- Dokaz da kandidat nema ostvaren radni staž/iskustvo u trajanju od 12 (dvanaest) mjeseci, nakon stečenog visokog obrazovanja (Potvrda/Uvjerenje Federalnog zavoda za PIO/MIO ukoliko kandidat nema ostvarenog staža uopšte ili Uvjerenje o podacima registrovanim u matičnoj evidenciji Federalnog zavoda PIO/MIO uz obaveznu potvrdu ranijeg poslodavca ili dokaz da kandidat nije radio na poslovima sa visokom stručnom spremom ukoliko kandidat ima ostvaren radni staž);
- Dokaz da kandidat nema ostvaren radni staž/iskustvo u trajanju od 6 (šest) mjeseci nakon sticanja srednje stručne spreme (Potvrda/Uvjerenje Federalnog zavoda za PIO/MIO ukoliko kandidat nema ostvarenog staža uopšte ili Uvjerenje o podacima registrovanim u matičnoj evidenciji Federalnog zavoda PIO/MIO), za lica koja se prijavljuju za stručno osposobljavanje bez zasnivanja radnog odnosa, nakon sticanja srednje stručne spreme;

(2) Ukoliko kandidat ne dostavi traženu dokumentaciju, kojom se dokazuje ispunjenost uslova iz člana 8. ovog Pravilnika prijava će biti odbačena kao nepotpuna, te će se o istom dostaviti pismena obavijest.

IV - POSTUPAK IZBORA LICA ZA STRUČNO OSPOSABLJAVANJE BEZ ZASNIIVANJA RADNOG ODNOSA PO OSNOVU RASPISANOG JAVNOG POZIVA

Član 10. **(Komisija za postupanje po prijavama)**

- (1) Općinski načelnik imenuje Komisiju za postupanje po prijavama po osnovu raspisanog Javnog poziva (u daljem tekstu: Komisija), koja broj 3 (tri) člana, od kojih je jedan predsjednik Komisije.
- (2) Komisija usvaja Poslovnik o radu na prvoj, konstituirajućoj sjednici.
- (3) Mandat Komisije iz stava (1) ovog člana traje isti vremenski period na koji je objavljen Javni poziv iz člana 6. ovog Pravilnika.

- (4) Zadatak Komisije iz stava (1) ovog člana je da svaka tri mjeseca pregleda prijave, te utvrdi koje prijave ispunjavaju uslove utvrđene ovim Pravilnikom.
- (5) Nepotpune, kao i prijave kandidata koji ne ispunjavaju uslove javnog poziva, Komisija neće uzeti u razmatranje.
- (6) Prijave, koje ispunjavaju uvjete Javnog poziva iz člana 8. ovog Pravilnika, a koje su u skladu sa Planom stručnog osposobljavanja iz člana 5. ovog Pravilnika, Komisija dostavlja Općinskom načelniku, uz prijedlog za donošenje odluke o prijemu lica na stručno osposobljavanje i zaključenje ugovora o stručnom osposobljavanju bez zasnivanja radnog odnosa sa podnosiocem prijave.
- (7) Po osnovu prijedloga iz stava (6) ovog člana Općinski načelnik donosi Odluku o prijemu lica na stručno osposobljavanje za lica nakon sticanja visoke stručne spreme – VII stepen, odnosno završenog prvog, drugog ili trećeg ciklusa bolonjskog studija i Odluku o prijemu lica na stručno osposobljavanje za lica nakon sticanja srednje stručne spreme.
- (8) Prilikom donošenja odluka uz stava (7) ovog člana, pod jednakim uvjetima prednost ima lice, koje ostvaruje posebna prava shodno relevantnim zakonskim i podzakonskim aktima vezanim za prava boračke populacije.
- (9) Po osnovu odluka iz stava (7) ovog člana zaključuju se pojedinačni ugovori o stručnom osposobljavanju bez zasnivanja radnog odnosa, shodno odredbama člana 3. ovog Pravilnika.

V - PRELAZNE I ZAVRŠNE ODREDBE

Član 11. (Važenje prijava)

Prijave koji se podnesu na raspisani Javni poziv, važe samo za tekuću godinu u kojoj su podneseni.

Član 12. (Stupanje na snagu Pravilnika)

Ovaj Pravilnik stupa na snagu osmog dana od dana objavljivanja u Službenim novinama Kantona Sarajevo.

Broj:

Datum:

**PREDSJEDAVALJUĆI OPĆINSKOG VIJEĆA
OPĆINE STARI GRAD SARAJEVO**

Seid Škaljić